

Am erschte Mittwoch im Februar



Texscht : Mike Sutter
Musig : Mike Sutter

**Am erschte Mittwoch im Februar
Nach em Mittag Punkt haubi zwöi
wärde landeswit – unüberhörbar
D'Sirene teschtet öb no aui göi**

**Sie singe ihres schuurige Lied
Vo de Decher obeabe übers Land
Komponiert aus Soundträck für e Chrieg
S'Lied vom Tod, lut u penetrant**

**Die beklemmend monotoni Melodie
Gnadelos fahrt sie dür March u Bei
Nach vierne Minute isch's verbii
Verschummt wie ne abgwürgte Schrei**

**Churz druuf – i de Zwöi-Nachrichte
Während s'Ghüu i mir no widerhaut
Ghör i se vo nüt angerem brichte
Aus vo Terror, Bombe, Hass u Gwaut**

**I hocke am Tisch mit weiche Chnöi
U hoffe innigscht i wärd's nie im Läbe gwahr
Das Hüüle, ussert gäng Punkt haubi zwei
Am erschte Mittwoch im Februar**